



Harry e Meghan

Description

Desde o comezo demostraron que non tiñan intención nengunha de facer o que lles correspondía se querían ser *working royals*, os membros de familia real que traballan, que son todos os principais, incluídos o rei ou a raíña. Eles querían, como se dixo moitas veces, *have their cake and eat it*, comer o bolo e gardalo, todos os privilexios e nengunha das obrigacións.

Meghan laíouse en público de que ninguén lle explicara como era o de ser da familia real e de que ninguén se preocupara de se tiña problemas de saúde mental. Pero, quen mellor que o Harry, que viña desa familia, para explicarlle como era o conto? E quen mellor que o Harry para axudala se tiña problemas de saúde mental, dado que el, polo que conta, sempre os tivera e estaba en comunicación constante cós psicoterapeutas que coidaban del? O que mais ben parece é que Meghan pensou que podería situarse no primeiro lugar moi axiña, e saíronlle as contas furadas.

Os dous atacan á monarquía británica ao mesmo tempo que a usan para facer os moitos millóns que necesitan para vivir no superluxo e figurar entre a xente importante, porque ao que non renuncian é aos títulos. Harry bota a culpa de todos os seus males e os de Meghan á Coroa e á prensa, e di que quer reformar ás dúas. Aos dous sentoulles mal que algúns xornais ingleses falaran da hipocrisía de que andiveran apresentándose como santos defensores do planeta e guerreiros do clima mentras cruzaban case a diario o Atlántico en avión privado para encontrarse con outros "concientizados".

Harry era antes o mais popular da familia real, o "simpático". Todo o mundo pensaba que a culpa de que cambiara era da Meghan, que o tiña dominado. Pero a corrente mudou logo das entrevistas e o libro del. Agora a maioría dos británicos pensa que é arrogante, insensível e aldraxeiro, e que vai usar todo e a todos para facer cartos e asoballar.

A cuestión agora é que vai facer o pai, Carlos II. Como pai, entenderíase que quixera manter a paz. Como rei, se deixa que consigan o que Harry esixe, que é que pidan perdón a Meghan, quedará como o home frouxo que moitos pensan que é. E será para nada, porque Meghan e Harry non van renunciar a seren as vítimas e os ofendidos.

E qué vai pasar coa coronación do Carlos II na primavera? Se os convidan, van coller perrenchas por todo, e se non os convidan tamén. E se asisten, ninguén vai querer falar con eles sabendo que o van contar todo. Case todo o mundo pensa que Harry faría ben en seguir a norma da familia real de *Never explain, never complain*, nen explicarse nen laiarse nunca. Pero calando non faría os moitos millóns que fai falando.

Decataráse o Harry de que perdeu o respeito e o cariño da maioría dos británicos? Non parece. Virá a separación de Harry e Meghan que moitos profetizan? Como o conto vai continuar, iráse vendo nos seguintes capítulos.

APARTADOSTEMATICOXEOGRAFICOS

Europa

ETIQUETAS

Reino familia Meghan
Galicia Unido internacional real Harry Markle

INVESTIGACION

Relacións Internacionais

Date Created

Xaneiro 25, 2023

Meta Fields

Autoria : 13892